

LA WG: DUMANDAS E RESPOSTAS

da Chatrina Josty

Chatrina: Oz eran nus mo en trais en il seminari da rumantsch, a l'uni.

Ralf: ...

Ch: Pertge na dis nagut?

R.: Tge duai jau dir sin quai?

Ch : Ti pudessas silmain dar in segn che ti m'has udì !

Ch: Lura vas oz a kino?

R: Jau na vom betg a kino! Hai gia ditg milli giadas che jau giaja oz ad in concert!

Ch: Tge crais ti, scrivan las dunnas auter ch'ils umens?

R : Gea, cler.

Ch: Pertge cler?

R: Las dunnas èn pli sensibilas ed uschia, perquai scrivan ellas er auter.

Ch: Che las dunnas sajan pli sensibilas ch'ils umens è bain mo in'invenziun dals umens! Medemamain dad els vegn l'idea, ch'els sajan perecunter pli raziunals. Ils umens han tscharvè e las dunnas sentiments, idea masculina, chapeschas?

R: Gea, "I gspürs."

Ralf ed jau giain a spass. Nus passain sper in crucifix (sco ch'igl ha tants a Fribourg). Sur quest stat l'inscripziun I.N.R.I.

R: INRI – tge vul quai puspè dir?

Ch: Bain cler, In Nomine Rex Iudaeorum. En il num dal retg dals gidieus.

R: Na, quai na constat betg. Betg "dals gidieus".

Ch. Ma segir – orum è in genitiv.

R: Na, quai è in verb sco laborare, sas laborum, ni uschia.

Ch: Na, also propi Ralf!

R: A gea, ti has forsa raschun. Ma igl n'ha betg num: "in nomine".

Ch: Ma segir!

R: Na, quai è bain "Iesus Nazarenus."

Ch. Naaaa! U bain, spetga, quai po esser. Gea, ti has raschun.

Dumondas e respostas - quai è timvörc, schess jau.

La "WG" - Chatrina Josty è studenta a Friburg e scriva dal mintgadi en la "WG" – la cuminanza d'abitar.